

XIV

Liturgia Eukaristia

Objetivu

Labarik sira konxiente kona ba liturgia Eukaristia ne'e laos
komemorasaun ida maibe realidade ida
Labarik sira komprende liturgia Eukaristia ne'e, Jezus rasik mak harii
Labarik sira hadomi Jezus hodi serbi nia maluk sira

Prosesu

Orasaun: Hodi Padre, hodi Filho,

Objetu: Usa ships/ rebusadu; hiit no dehan ne'e ships/ rebusadu, ita sei
fahe ba malu no han hamutuk. Hafoin pasa falun ne'e atu ema ida
-ida bele foti ida, no han.

Sagrada Skritura: Mt 26: 26-29

Eukaristia ba dala uluk

²⁶Wainhira sira han dau-daun, Jesus kaer paun, haraik bensa, silu hodi
fahe ba nia eskolante sira dehan: "Simu no han ba: ne'e Ha'u nia isin."
²⁷No Nia kaer kalis, fo tiha agradese, fo ba sira dehan: "Imi hotu, hemu
ba: ²⁸ne'e Ha'u nia ran moruk foun nian nakfakar ba ema barak atu kasu
sala. ²⁹Ha'u dehan ba imi: Ha'u sei la hemu tan fuan uvas ne'e to'o loron
nebe Ha'u sei hemu fali nia hamutuk ho imi iha Ha'u Aman nia reinu."

Wainhira imi haree ha'u hiit sa'e (*ships/ rebusadu*;) nia falun ohin,
imi gusta ka lae? Imi hakarak han ka lakohi? Wainhira ita hamlaha, hare
ema nia molen, paun, es, ita tanis ka lae? Tanis husu ama atu sosa loos ka
lae? Ita hamlaha tanis dadaun ba ai-han, mak ita rona Jezus dehan, "Simu
no han ba: ne'e Ha'u nia isin."... "Imi hotu, hemu ba: ne'e Ha'u nia ran
moruk foun nian nakfakar ba ema barak atu kasu sala! ita hakfodak,
nu'udar ema oinsa bele han ema ida nia isin. Maibe se ita hanoin didiak
karik, Nia mak Maromak Oan, no Maksoin halo ida ne'e atu kasu sala.
Laos atu habosu ema nia kabun be hamlaha ne'e. Tan ne'e, Jezus nia
hahalok no liafuan ida ne'e Kreda hanaran harii Eukaristia.

Iha ita nia katekese ohin, ita sei koalio kona ba **Liturgia Eukaristia**.
Liturgia Eukaristia mak Kreda hakerek nia regulamentu oinsa ita atu halo
hodi hanoin Jezus iha momentu ne'ebá nian, tempo maka lahanesan
maibe lalaok hanesan deit, nune'e ho fiar ita deklara Jezus nia presenja

iha ita leet wainhira ita halo selebrasaun Misa. Hanesan iha introdusaun geral misal romano dehan; Iha han ba dala ikus nian, Jezús harii Sakrifisiu Paskua nian no han hamutuk, iha ne'ebé Sakrifisiu ne'e kontinua halao iha Kreda wainhira amululik, representa Na'i Jezús Kristu, halo buat ne'ebé Na'i rasik mak halo no hatoo ba nia disiplu sira atu halao hodi hanoin Nia. ([SC](#), no. 47).

Kristu foti paun no kálise no fo agradese; nia fahe paun no fo ba nia disiplu sira, dehan “foti han no hemu: ne'e mak ha'u nia isin; ida ne'e mak kálise ha'u nia ran nian. Halo ida ne'e hodi hanoin ha'u”. Nune'e, Kreda tau iha orden selebrasaun liturjia Eukaristia nian iha parte ida-ida tuir Kristu nia liafuan no lalaok ne'e:

1. Preparasaun oferta nian, paun no tua ho bee lori ba altar, sasan sira ne'e hanesan ida be uluk Jezús kaer iha nia liman.
2. Iha orasaun Eukaristika, agradese ne'e hasa'e ba Maromak ba obra salvasaun tomak, no oferta sira sai fali Jezús nia futar isin no ran.
3. Liu husi fahe no simu komunga, fiar nain sira maski sira barak, simu husi paun ida Na'i nia isin no husi kálise ida Na'i nia ran, hanesan Apostolu sira simu husi Kristu nia liman rasik.

Misa iha parte ne'e, buat tolu mak ita sei halo, hanesan iha leten ne'e; ofertorio, Eukaristika no komunga. Buat tolu ne'e ita sei haklean ida-ida iha domingu mak mai. Misa ne'e nia tutun ka pontu aas liu mak iha parte ida ne'e, basa iha ne'e mak, halulik no fahe ba malu eh han hamutuk.

XV

Prepara oferta

Objetivu

Labarik sira konxiente katak molok simu ofertas be lori ba altar uluk nanain prepara altar.

Labarik sira komprende liturjia Eukaristia ne'e hahu husi ofertorio

Labarik sira hadomi Kreda no kiak sira hodi fo esmola

Prosesu

Orasaun: Hodi Padre, hodi Filho,

Objetu: Purifikador, korporal, Misal, patene, siborium, pall, kruet no kálise (se labele karik lori, hatudu nia nia imagem)

orasaun, la halo ho fuan no laran, no ho fiar, ne'e hakneak ne'e la iha nia signifiadu. Lliturjia ka orasaun be hadook husi hakneak sei halo fraku liturjia ka orasaun ne'e rasik.

Amlulik: Na'i, Ita santu tebes duni:

**SIMU BA, HOT-HOTU HAN. NE'E HA'U NIA ISIN, SARAN
BA MATE TAN IMI**

Nune'e mos, han hotu tiha, Nia foti kalis, fo agradese, fo ba Nia eskolante sira dehan:

**SIMU BA. HOT-HOTU HEMU: NE'E KALIS HA'U RAN
NIAN, RAN ALIANSA FOUN NO ROHAN LAEK, TAN IMI,
TAN EMA TOMAK SEI NAKFAKAR ATU KASU SALA.
HALO IDA NE'E HODI HANOIN HA'U.**

Amlulik: Misteriu fiar nian.

Povu: (Hamriik no haklaken ho laran)

**Na'i, ami fo hatene Ita nia mate ami haklaken Ita moris
hias. Na'i Jesus, hiit An mai.**

Amlulik: Na'i, oras ne'e, ami hanoin Ita Oan nia mate no moris hias.
Ita nia Oan. **Aman Maromak bele halo hot-hotu, hodi
Kristu, ho Kristu, iha Kristu, ami hahi, hana'i nafatin Ita
Boot hamutuk ho Espiritu Santu.**

Povu: (Hatan ho lia makaas, eh hananu) **Amen.**

2. Hakneak

Ema nia lalaok ka pojisaun hakneak mak ain tur ruan ne'e hotu halo kleuk no kona iha rai ka hakneak fatin, ain tur lori isin nia todan. Hakneak ne'e simbolisa ka hatudu: a) ema nudar folin laek entriga an ba Na'i be Kbiit Nain, b) arepende no nakfilak an, c) adora ka honra no hanai iha orasaun. Iha misa fiar nain sira hakeak iha:

- Reza / hananu Liu tiha Santu,
- Simu liu tiha kumuñaun
- Wainhira reza mesak

Se labele hakneak karik, hamriik laos tur. Baibain ita hakneak atu harohan. Ema hotu tenke hakneak iha misa laran momentu konsagrasaun nian, momentu ita husu diskulpa, perdaun ka promesa no harohan ba Na'i. Nailulik insensu ba Kristu nia Isin, iha adorasau, ema hotu hakneak.

Iha ema nia lalaok baibain nian dala ruma, hadook oituan husi hakneak wainhira harohan no adora Na'i. Nune'e keta haneak mos hanesa genuflek, halo tamba ema hotu halo, la iha hanoin ka konsente kona ba



Sagrada Eskritura: Lc 21: 1-4

Feto faluk nia esmola

¹Foti tiha matan, Nia hare ema riku sira tau esmola iha osan fatin templu nian. ²Nia hare mos feto faluk kiak ida nebe tau nia esmola osan kiik rua. ³Nia dehan: "Tebes, Ha'u dehan ba imi katak feto faluk kiak ne'e tau osan folin liu sira seluk hotu, ⁴basa housi buat nebe resin, sira fo buat karan, maibe ema kiak ne'e saran buat hotu nebe nia iha atu moris."

Ohin ita hare, sasan sira be usa iha Misa. se buat hirak ne'e ida la iha Misa ne'e la bele halo. Ostia la iha, ne'e labele tamba amululik sei konsagra saida, no ita sarani sira sei simu komunga oinsa? Nune'e sasan sira ne'e ida-idak iha nia importansia, nune'e tenki iha, labele falta wainhira atu halo misa ida.

No iha misa laran imi hare ema pasa sestu ka bornál, ema ida-idak hanoin tau buat ruma, ne'e mak naran fo ezmola. Iha kredo nia ukunfuan 5 ne'e ida dehan "sei fó ezmola hodi tulun, Santa Kredo no nailulik sira". Nune'e foin iha evanjellu ita rona Jezús gaba feto faluk, dehan "Tebes, Ha'u dehan ba imi katak feto faluk kiak ne'e tau osan folin liu sira seluk hotu, ...ema kiak ne'e saran buat hotu nebe nia iha atu moris."

Ita nia tema ohin nian koalia kona ba oferta/ ezmola. Se ita husu, oferta mak saida, iha disionario tetun nian dehan oferta ne'e Hahalok oferese nian. Buat ruma ne'ebé ita oferese ka fó. Ez. Oferta ne'ebé di. ak la presiza karu, maibé importante liu mak fó ho laran tomak. Nune'e liafuan oferta ne'e katak fó ka hasa'e buat be ita iha ho fuan no laran tomak.

Iha misa laran momentu ofertorio nian, sei pasa bornál ka buat seluk ruma atu ema tau nia ezmola, no sei lori ba altar hamutuk ho objetu be foin ita hare ne'e. Ita nia oferta ka buat be ita tau ba ezmola ne'e, tau hamutuk ho óstia no tua, hasa'e ba Maromak hodi nakfilak ba Kristo nia Futar Isin no Ran, sai ai-han ba isin no kلامار.

Oferta sira lori ba oin. Ida ne'e soin duni sarani sira mak lori/ hasa'e hamutuk paun no tua. Buat hirak ne'e Padre ka diákonu simu iha fatin apropiadu hafoin lori ba altar. Maski sarani sira laos ida-idak lori sira nia oferta ba altar, oferta be hasa'e ka lori ba altar iha liturjia ne'e hanesan nafatin uluk be Jezús halo, lori oferta ba altar matein kbiit no signika kbiit espiritual nian. Laos ha'u mak ba, maibe iha laran ha'u lao hamutuk hasa'e ha'u nia hahalok diak sira ba Maromak hamutuk ho Jezús nia Sakrifisiu ne'e.

Bele mos osan no sasan sira seluk ba kiak sira no Kreda, sarani sira mak lori ka koleta iha kreda (osan be be tau iha bornál), tenki simu iha altar oin. Buat hirak ne'e tau iha fatin ida haketak husi meza eukaristia (Altar). Tau iha altar nia oin ka okos maibe labele iha altar leten hamutuk ho objetu sira be foin ita hare ne'e eh paun no tua be atu nakfilak ba Kriato nia Isin no /Ran ne'e.

Prosisaun be lori oferta sira ne'e akompañá ho knananuk ofertorio nian, hananu too oferta sira ne'e tau ona iha Altar. Norma no maneira hananu nian hanesan mos entrada nian. Hananu hodi akompañá nafatin ritu, iha ofertorio, maski la iha prosisaun ho oferta sira, knananuk ofertorio nian, hananu nafatin, hodi akompañá nailulik iha altar/ prepara ritu ne'e.

Maromak la hare ezmola be ita fo ne'e kiik ka boot, eh koor saida?, Maromak haree deit, ó fó buat be resin ka ida be ó opresisa ne'e? Exemplu; ó iha \$0.25 atu sa'e kareta fila mai uma, maibe ó tau tiha ba bornál laran fila mai uma lao deit, ne'e mak naran ó tau ba bornál laran buat be ó preisa hela. Maromak hare mak ida ida ne'e laos tau hira?

Orasaun hasa'e buat karan

Wainhira offertas sira tau ona iha altar leten no ritu remata ona, konvida atu harohan ho nailulik no orasaun oblatas mak hakotu preparasaun ba ofertoriu no prepara fali ba rasaun Eukaristika.

Povu, tau sira nia an hamutuk ho harohan be hasa'e ho fuan no laran tomak ne'e, halo orasaun ne'e nu'udar sira nian rasik hodi hatan Amen.

Iha misa parte ofertorio too iha orasaun hasa'e buat karan nian (Oração sobre as oblatas), maka hakotu momentu ofertorio nian, no iha orasaun ne'e nia konkluziun dehan; husi Kristu Ami Na'in, katak ita hasa'e buat hirak ne'e ba Maromak maibe liu husi Jezús Kristu basa Jezús Kristu mak dalan ba Maromak.

ordenasaun. Iha povu nia parte, tenke tau sira nia an hamutuk ho nailulik iha fiar no iha nonook, iha sira nia parte hatudu iha orasaun Eukaristika mak: ho naran, hatan iha Diálogu Perfasiu nian, *Santu*, hatan depois de konsagrasiun, hatan ho Amen depois de hahi (doxology), ka ho hatan seluk be aprova husi Bisspu sira no Santa se. Se diak liu amululik sira hananu parte orasaun Eukaristika nian iha ne'ebé nota sira ne'e aprova.

Wainhira hahu Orasaun Eukaristika, nailulik hiit liman hodi hananu ka dehan; *Maromak hela ho imi*. Povu hatan, *hela mos ho ita*. Nune'e nia kontinua, *foti neoan ba Maroma*), nia hiit sa'e nia liman. Povu hatan, *Habemus ad Dominum (ami hasa'e ba Maromak)*. Hafoin amululik, lolo liman, hatutan tan, *Mai ita agradese Na'i, ita nia Maromak*, povu hatan, *ne'e ami knaar atu hahi no agradese ba Nia*. Tuir mai, nailulik, hiit sa'e liman, kontinua ho Preface. Iha nia konkluziun, nia tau liman hamutuk no, ho ema hotu ne'ebé prezente, hananu ka reza *Santu*.

Momentu ne'e sarani sira hotu hakneak.

Molok konsagrasiun, iha momentu ida, akolitu dere sinu nu'udar sinal ba fiar nain sira. Tuir kostume iha local nian, akolitu dere sinu wainhira nailulik hiit sa'e, ostia no kálise. Se insensu karik akolitu insensu ostia no kálise wainhira hiit sa'e ka hatudu pa povu.

Liu tiha konsagrasiun amululik dehan, *Misteriu fiar nian*, (Mai ita haklaken misterio fiar nian), povu hatan hodi hananu ka reza tuir formula ne'ebé iha ona. Too iha Orasaun Eukaristika nia rohan, amululik foti patena ho ostia no kálise hiit sa'e hodi reza ka hananu doxology (hahi); **hodi Kristu, ho Kristu, iha Kristu** (liu husi Nia). Amululik remata ona povu hatan Amen. Amulik tau patena no kálise iha corporal leten.

Misa iha parte ne'e nia formula hanesan tuir mai ne'e;

Amlulik: Maromak hela ho imi.

Povu: **Nia iha ami leet.**

Amlulik: Foti neon ba Maromak.

Povu: **Ami neon iha Maromak.**

Amlulik: Fo agradese ba Na'i Maromak.

Povu: **Ne'e ami knaar, ami maksoin.**

ORASAUN EUKARISTIKA

Amlulik: Na'i, Aman Santu,

Povu: **Santu, santu, santu, Na'i Maromak kbiit Na'in; lalehan ho rai haklaken Ita Boot nia gloria. Hosana leten aas ba. Diak tebes Ida be mai hodi Na'i nia naran. Hosana leten aas ba.**

Jesus nia hanhemu dala ikus

¹⁴Wainhira oras to'o ona, Nia tur atu han no apostolu sira hamutuk ho Nia. ¹⁵Nia dehan: "Ho laran manas, Ha'u hakarak teb-tebes han Paskua ne'e hamutuk ho imi molok Ha'u terus. ¹⁶Basa Ha'u dehan ba imi: Ha'u sei la han tan nia to'o nia sei sai los iha Maromak nia reinu." ¹⁷Kaer tiha kalis, Nia fo agradese dehan: "Imi simu ba, hodi fahe ba malu; ¹⁸tebes Ha'u dehan ba imi: Ha'u sei la hemu tan tua uvas fuan nian to'o Maromak nia reinu sei to'o mai."

¹⁹Hafoin, kaer tiha paun hodi fo agradese, Nia silu hodi fahe ba sira dehan: "Ne'e Ha'u nia isin saran tamba imi; halo ida ne'e hodi hanoin Ha'u." ²⁰Nune'e mos, han hotu tiha, Nia halo hanesan ho kalis dehan: "Ne'e kalis moruk foun nian iha Ha'u nia ran nakfakar tamba imi. ²¹Liman ema nian nebe atu saran Ha'u ba mate hamutuk ho Ha'u iha meja leten. ²²Oan Mane sei ba ona duni, tuir buat nebe hakotu tiha ona; maibe susar ba ema nebe saran Nia!" ²³Sira hahu husu ba malu ida nebe mak sei halo buat ne'e.

Imi hatene livru tolu ne'e saida nian? Nudar labarik ita gosta livru, istoria nian, pinta nian. Maibe livru tolu, mak importante wainhira ita atu celebra misa. Se la ho Biblia ita la hatene no koñese Maromak, nune'e mos la ho Lectionario ita labele reza misa no la iha Misal ita la bele lee leitura sira? Nune'e livru ida-idak mak importante tuir ita nia presiza, atu hakbesik an ba Maromak.

Se ita rona didiak karik iha Sagrada Eskritura wainhira fo bensa ba paun no tua hodi fo ba nia Apostolus sira, Nia dehan: **"halo ida ne'e hodi hanoin Ha'u."** Tan ne'e ne'e mak, oras ne'e ita halo tuir buat be Jezús halo hodi hanoin katak Nia mak halo, nailulik hola Jezús nia fatin deit, maibe misteriu Nai nian hori nanis mai. Nakfilak paun no tua ba Jesus nia isin ne'e laos nailulik mak halo maibe ida ne'e Kristu mak halo, hori nanis kedas, nailulik hola Na'i nia fatin halo hanesan Kristu halo.

Nune'e Misa ne'e nia pontu aas liu maka, iha misterio be nakfila hostia no tua ba Kristu nia isin no ran.

Orasaun Eukaristika. Tuir buat be hakerek ona, nailulik hili orasaun Eukaristika ida husi hirak be iha livru Misal Romano ka aprova ona husi Santa Se. Orasaun Eukaristika obligatorio, hanesan ne'e hori nanis mai, nailulik deit mak bele reza ida ne'e ho laran tomak no hodi ninia

XVI Simu Ofertorio

Objetivu

Labarik sira konxiente kona ba importasia simu ofertorio

Labarik sira komprende simu ofertorio iha Altar

Labarik sira ho fuan no laran rona no hatan orasaun iha parte ida ne'e nian

Prosesu

Orasaun: Hodi Padre, hodi Flho,

Objetu: Purifikador, korporal, Misal, patene, siborium, pall, kruet no kálise (se labele karik lori, hatudu nia nia imagem)

Semana uluk ita hare, objeto ida ne'e, no ohin mos ita hare buat hanesan deit. Karik imi balun baruk ka kole hare buat hanesan, maibe, ida ne'e diak mai ita atu komprende liu tan. Sasan hirak ne'e, mak ita hanaran sagradu/ lulik. Dala barak eh dala ruma iha misa ita hamriik dook deit, la hare hetan altar, sa tan sasan sira ne'e. Nune'e ohin ita bele hare besik liu tan, nune'e iha misa laran karik ita la hetan fatin atu hamriik besik karik ita bele imajina, wainhira amululik harohan orasaun sira ne'e ka iha momentu nonok nia laran.

Sagrada Eskritura: Jo 19: 31- 37

Soldadu ida sona borus Jesus nia sorin

³¹Tamba laron neba laron hadia an nian, atu ema mate sira nia isin la bele hela iha krus iha laron Sabadu, tan Sabadu ne'e laron boot ida, Judeu sira husu Pilatos atu hatohar tiha sira nia ain, hodi hasai sira housi krus. ³²Ne'e duni, soldadu sira mai baku tohar tiha ema uluk nia ain, hafoin ida seluk nian, sira nebe sira hedi iha krus hamutuk ho Jesus. ³³To'o tiha Jesus, tan hare Nia mate tiha ona, sira la hatohar nia ain; ³⁴maibe soldadu ida sona borus nia sorin ho diman no be kahur ho ran suli sai. ³⁵Ema nebe hare buat ne'e, nia rasik mak fo sasin; nia lia sasin los tebes; nia hatene katak nia koalia los atu imi mos bele fiar. ³⁶Buat sira ne'e mosu duni atu tuir eskritura: "Nia ruin ida mos ema sei la hatohar." ³⁷Eskritura seluk tan dehan: "Sira sei fihir ema nebe sira sona borus."

Iha semana uluk, ita koalia kona ba fo esmola, lori ba Altar. Ohin

ita sei koalia kona ba simu iha Altar. Ofertas sira ne'e, simu ona iha Altar; Nailulik foti paun iha patene. Hiit sa'e ho liman rua, hodi harohan iha laran *Benedictus es, Domine* "Rahun diak ba ita, Na'i". Nia tau paun ho patene iha corporal leten.

Liu tiha ida ne'e, akólito/ ministru lori kruet, amululik hamriik iha altar nia sorin fui tua no bee oituan iha kálise laran, *harohan ho nonok Per huius aquae* "husi Misterio ho bee ida ne'e". Nailulik fila ba iha altar nia klaran, foti kális ho liman rua, hiit sa'e oituan harohan ho nonok *Benedictus es, Domine* "Rahun diak ba Ita Na'i". Hafoin nia tau fali kálise iha corporal leten no taka didiak ho palla.

Se la hananu knananuk ba ofertório karik, momentu hiit sa'e paun no kálise ne'e nailulik bele harohan ho lian makaas, atu povu bele hatan **Kmanek wain nafatin ba Maromak**. Formula hanesan tuir mai ne'e:

Amlulik: Na'i, hot-hotu nia Maromak, kmanek wain ba Ita Boot tamba paun ami simu hosi Ita Boot laran luak, mai hosi rai, mai hosi ema kolen, ohin ami hasa'e ba Ita Boot, atu nakfila mai ami paun moris nian.

Povu: **Kmanek wain nafatin ba Maromak.**

Amlulik: Na'i, hot-hotu nia Maromak, kmanek wain ba Ita Boot tamba tua ami simu hosi Ita Boot nia laran luak, mai hosi uvas, mai hosi ema kolen, ohin ami hasa'e ba Ita Boot, atu nakfila mai ami tua maksoin.

Povu: **Kmanek wain nafatin ba Maromak.**

Amlulik: Maun alin sira, ita sei harohan atu Maromak bele hot-hotu simu ita nia sakrifisiu.

Povu: Na'i simu ita nia sakrifisiu ne'e, atu hahi Nia naran, atu hetan diak mai ita no ba Santa Kreda tomak.

Amlulik: (*Hamulak atu hasa'e buat karan nian*) ... Ami harohan ne'e, hodi Na'i Jesus Kristu nia naran, hamutuk ho Espiritu Santu.

Povu: **Amen.**

Tau tiha kálise iha altar leten, amululik hakneak/ hakruuk no harohan ho nonok: *In spiritu humilitatis* Na'i Maromak, ami husu Ita atu simu ami. (Na'i, simu ami be haraik an no hakkribit sala; Na'i Maromak, hakmatek ami nia sakrifisiu ne'e iha Ita boot futar oin).

Se uza insensu karik, padre tau iha turiblu laran, fo bensa maibe la dehan buat ida, halo insensu ba oferta, Kruz no Altar. Ministru/ ida be lori turiblu hein iha Altar sorin atu sinsensu nailulik no povu

Reza liu tiha orasaun Na'i Maromak, ami husu Ita atu simu ami ka

insensu, amululik fase liman iha Altar nia sorin, akólito fakar bee, amululik harohan iha laran "Na'i, fase mos tiha hau husi ha'u nia aat, kasu ha'u salan

Hafoin fila ba hamriik iha Altar ninia sentru, amululik hateke ba povu, taka liman, konvida povu atu harohan, hodi dehan; maun alin sira, ita sei harohan, atu Maromak bele halo hotu-hotu, simu ita nia sakrifisiu. Povu hamriik no hatan; Na'i simu ita nia sakrifisiu ne'e, atu hahii Ita naran, atu hetan diak mai ita no ba Santa Kreda tomak. Hafoin nailulik loke liman harohan hasa'e buat karan nian povu hatan Amen.

Karik ofertas ne'e ema seluk mak lori ba altar, ita iha ita nia fatin, hanoin hanesan ita mos ba no hanoin hasa'e ba Maromak ita nia hahalok diak sira. Ita hadomi ita nia papa no mama, alin no bin sira, kolega sira nsst. Ita harohan hasa'e no husu ba Na'i, no amululik iha Kristu nia fatin hasa'e ba Maromak ita nia hamulak sira be foin ita dehan sai ka hanoin iha laran ne'e.

XVII

Orasaun Eukaristia

Objetivu

Labarik sira konxiente kona ba orasaun ne'e nia importánsia

Labarik sira komprende momentu ne'e centru no pontu aas liu ba selebrasaun ne'e tomak

Labarik sira fo atensaun tomak no ho fuan no laran rona no hatan orasaun ne'e

Prosesu

Orasaun: Hodi Padre, hodi Flho,

Objetu: Biblia, Misal, Lectionsrio.

